

Rapport dalla sessiun dil cussegl da vischnaunca dils 08-09-2014

Tractanda 1

Approbaziun dil protocol dalla sessiun dils 14-04-2014

Il protocol dalla sessiun dils 14-04-2014 vegn approbaus en votaziun unanima cun engraziament.

Tractanda 2

Informaziun davart situaziun cun ovras electricas a Trun

Il matg 2011 ha il cussegl da vischnaunca concediu in credit per schar elaborar in preproject per ina Ovra hidraulica Zavragia. Il preproject ei vegnius elaboraus dil biro d'inschignier Walter Deplazes e presentaus l'entschatta digl onn 2013 al cussegl da vischnaunca. La suprastanza communal ha contactau ils partenaris d'energia Axpo e Repower per sclarir igl interess da realisar ina nova ovra e fundar comunablamain ina societad acziunara. Igl ei semussau ch'igl interess dils partenaris ei da principi avon maun. Denton ei la fiera d'energia actualmein fetg schliata ed il mument buca adattaus per realisar ina nova ovra hidraulica ella vischnaunca da Trun.

Signur Michael Bätcher dalla Axpo orientescha a caschun dalla sessiun da questa sera las cusseglieras ed ils cussegliers en detagl davart la situaziun da pussevlas novas ovras hidraulicas a Trun e dalla situaziun actuala dalla fiera d'electricitad.

Tractanda 3

Approbaziun dil quen 2013 dalla meglieraziun Schlans

Igl onn 2013 ha ei dau expensas totalas da frs. 598'628.75 ed entradas totalas da frs. 494'795.75. Las expensas totalas per igl entir project da meglieraziun da Schlans contonschan per la fin digl onn 2013 la summa da frs. 7'698'321.-. Las entradas da confederaziun, cantun, vischnaunca e privats muntan à frs. 7'855'787.-.

La canzlista Sandra Gautschi presenta il quen en detagl.

Il quen ei vegnius revedius dalla cumissiun da gestiun e dil revisur da quen dil cantun.

Cun 12 : 1 vuschs vegn il quen 2013 dalla meglieraziun Schlans approbaus.

Tractanda 4

Project 2015 dalla Casa s. Martin (Engrondaziun sala da spisa remplazzament dil scaldament etc.)

Enteifer il project 2015 vul la Casa s. Martin realisar suandonts projects:

1. Engrondaziun dalla sala da spisa dils cussadents

La sala da spisa porscha memia pauc plaz per il diember da cussadents actual. Era sa buca vegnir ademplier giavischs d'envidar confamiliars en la Casa s. Martin a magliar. Igl ei previu d'engrondir la sala per 40 plazs.

2. Remplazzament dil scaldament

Il sistem da scaldar actual cun ieli datescha digl onn 1988. En connex cun l'engrondaziun dalla sala da spisa sedat ina buna caschun da midar il sistem da scaldar. La Casa s. Martin intenziunescha da far ina midada sin l'energia ord la tiara.

3. Sanaziun dil plaz avon casa

Il plaz avon casa vegn duvraus sco plazzal da lavur e sto vegnir adattaus all'engrondaziun dalla sala da spisa. En quei mument ei planisau da dar al plaz ina tempra nova cun ina cuvrida da plattas da crap, ina fueina e novas pusseivladads da seser.

4. Sanaziun da parts dallas fatschadas dil baghetg

Las fatschadas dil baghetg vegl ein attacadas d'in buliu e vegnan pli e pli neras. Per megliurar la cumparsa dalla casa ei previu da sanar las fatschadas donnegiadas.

Il project vegn presentaus allas cusseglieras ed als cussegliers entras igl architect responsabel.

Il cuosts totals pil project 2015 muntan à frs. 1'750'000.-. Il project sa vegnir finanziaus ord mieds dalla Casa s. Martin.

Cun 13 : 0 vuschs decida il cussegl da vischnaunca da proponer per mauns dalla votaziun all'urna l'approbaziun dil project 2015, da conceder il credit da frs. 1'750'000 e da finanziau tal ord mieds dalla Casa s. Martin.

Tractanda 5

Pusseivladad da tschentar damondas

Il president communal orietescha davart il suandont:

Ulivaziun da finanzas

Donat Nay fa attents davart la situaziun disfavoreivla che la nova ulivaziun da finanzas cun in meins d'entradas da rodond frs. 828'000 purtass alla vischnaunca da Trun. El appellescha perquei als presents da votar encunter la nova lescha d'ulivaziun da finanzas.

Project Campadi Ogna

President communal Donat Nay informescha il cussegl davart il stan dil project Campadi Ogna.

Igl onn 2013 han ils architects Iso Huonder e Lorenz Eugster gudignau la concorrenza da project per il niev campadi e survegniu l'incarica da luvrar ora in preproject.

Plinavon vegn la fundaziun dalla Campadi Trun SA preparada e stat avon porta. La societad anonima ha suenter la responsablidad cumpleina per la planisaziun, la projectaziun, la construcziun, la finanziaziun, sco era pil menaschi futur dil campadi. La vischnaunca metta a disposiziun ils credits tenor decisiun dil pievel digl atun 2013.

Il niev cussegl d'administraziun ha la finamira da deliberar il preproject aunc quest atun. La fasa da preproject ha cuzzau pli ditg che previu. Quei denter auter ord motiv ch'il program da spazi pretendiu en la concorrenza da project ei grevs da realisar cun il credit da frs. 3.6 milliuns. Ils responsabels han stuiu vegnir tier la conclusiun ch'entginas reducziuns tier il program da spazi ein necessarias per saver tener en ils cuosts.

Il dessignau cussegl d'administraziun ha tschentau a sesez 3 claras finamiras: El vul tener en strictamein ils cuosts previ, il program da spazi fixau en la concorrenza da project ed empermess dils architects sto vegnir realisau senza stuer desister sin caussas substanzialas e la piazza da campar futura duei saver vegnir administrada cun aschi bass cuosts da menaschi sco pusseivel.

La fasa da baghegiar ei previda sin la primavera 2015. Las lavurs per il niev campadi dueien vegnir terminadas duront la stad / igl atun 2016. Il menaschi dil campadi duei saver cuntinuar duront l'entira fasa da baghegiar.

Las cusseglieras ed ils cussegliers fan diever dalla pusseivladad da tschentar damondas.

Per il cussegl da vischnaunca

Il president
Rico Schwarz

L'actuara
Sandra Gautschi